

quod Iuno nuncupatur. Vnde sat liquido demonstratur, quod in hoc Aristoteles & Salomon conueniant: videlicet aerem siue ventum à radiis & motu solari gubernari. At vero ventorum motus varietatem à variis solis & cæterarum erraticarum aspectibus seu reflexionibus accidere certum est, atque Astronomorum peritorum experientia comprobatur. Cum vero omnes stellæ vitam & Esse luminosum à sole accipiant, inde sequitur, quod omnes Planetarum actiones ab ipsorum propter diuersos ad inuicem aspectus influentiis profluentes originaliter à Solis anima seu vnitatem centrali proueniant, nec mirum, cum ab eodem igne diuersos oriri videamus effectus. Verbi gratia, calefacit clementer, torrefacit & vrit sine misericordia, humectat per accidens, quod fit subtiliando, & tamen de sicca humiditatis ablatione à terra calcinata viuificat & destruit, reflexione corpora magis cruciat, in angulum contractus viuaciter penetrat, expansus euanescit. Pariter sol agit diuersimode, secundum media diuersa per quæ transit, verbi gratia, in aere calefacit suauiter, in aqua magis temperatur eius ardor, terram quandoque fouet, graminaque & herbas & arbores, vegetare facit, & quandoque terram & eius fructus comburit & findit excessiuo suo calore: at vero, nihilominus sol est in temperatura sua essentiali semper idem, nec variare cernitur, nisi ob mediorum & corporum diuersitatem: nam in aere aperto clementer fouet, at mediante speculo ardente crudeliter vrit, & tamen semper in se est idem & eiusdem virtutis solummodo pro more passiuæ recipientis varie agere obseruatur, verbi gratia, in cælo radios suos communicat corporibus planetariis, qui iterum reflexione secundaria vel tertiaria, hoc est ab vno Planeta ad alium, secundum diuersitatem distantiae locorum, & differentiam corporum, & varietatem aspectuum, varios in elementis proferrunt effectus: hinc ergo est, quod cum Deus vult hunc vel illum effectum, pro placito suo, secundum naturæ ordinem, in terra vel aere procreare, tunc hunc vel illum Planetam respicit, cuius aspectu & cæteri planetæ se inuicem respiciunt, atque hinc inde venti varij oriuntur, quorum animæ nihil aliud sunt, vti ante est copiose declaratum, quam spiritus seu dæmones, à variis cæli mundis seu orbibus planetariis influxionibus occultis deorsum demissi; hinc diximus in præcedentibus, quod Angelus soli præsidens sit Metatron, quem nihil aliud esse explicauimus secundum Cabalistarum doctrinam, quam emanationem illam primariam, seu sapientiam illam lucidam ante omnia creatam, à qua omnia tum postea sunt creata, cui etiam omnes angeli boni obedire atque obtemperare solent, non aliter quam cæteræ stellæ soli virtute, luce, & dignitate postponendæ sunt, & consequenter omnes illi præsidēs angelici seu intelligentiæ, quibus orbium illorum lucidorum imperium attribuitur: qui aspiciente sapientia à suo palatio centrali, in solis visibilis meditullio existente, solis inuisibilis mandata & voluntatem, tanquam domini diuini & vniuersalis perficiunt.

Correlatio ad machinæ illius nostræ proprietatem.

DEVS, Lucis, & consequenter caloris (qui est lucis effectus fons & origo supernaturalis) posuit tabernaculum suum in sole, à quo fonte naturali vim igneam dat cælo & elementis, deinde elementatis tam cælestibus, cuiusmodi sunt stellæ erraticæ & fixæ, quam sublunaribus, inter quæ fulminaris ignis & ille terrestris primum sibi vendicant locum: Si ergo aereus spiritus alteretur à calore immediate igneo, seu ab agitatione seu motione violenta, vti in duorum corporum collisione & rotæ circumuolutione liquet, hoc respectu principii naturalis oritur primordialiter à Sole, qui vim suam centram, tam mouentem & agitantem, quam calefacientem à Deo, mediante suo angelo Metatron accepit, videmus ergo, quod mediante Calore, cuius pater est sol, aer seu spiritus vniuersalis, & consequenter particularis regatur, & dilatatione moueatur atque circumducatur, non aliter quam halitus humanus introducit & extra spiratur, mediante anima humana. Particularis ergo spiritus in vitro seu matræo inclusus, caloris præsentia dilatatur, & in dilatatione sua ampliolem requirit locum, ita vt eius spissitudo quam congregauit frigus, iam dissipetur & pellatur in partem contrariam sedis caloris.

Sic etiam in ventorum Hyemalium generatione certum est, ipsum solem primum obtinere locum. Ratio in promptu est, quoniam scilicet sole in partibus vltra æquinocetialibus prædominante, & mirum in modum propter radiorum suorum perpendicularitatem ibi locorum calefaciente, necesse est, vt aer tempore æstatis nostræ, sole videlicet Taurum Geminos Cancrum & Leonem habitante, frigore condensatus, iam (tempore dico apud nos brumali) iterum præsentia solis propinqua dissoluatur, subtilietur & ob subtilitatem suam locum ampliolem requirat, in quo contineatur, quare crassior aeris pars in partem seu polum mundi oppositum ab Austro Septentrionem versus vt plurimum tendit, idque minori vel maiori violentia, secundum maiorem vel minorem solis actionem in aere, in plagæ illius aperto. Hinc ergo fit, quod Venti Australes sint tam frequentes in tempore apud nos hyemali, videlicet propter attenuationem aeris in Antartica æquatoris parte, quæ fit præsentia solis, vnde etiam euenit, quod aer illius quartæ seu plagæ ita rarefactus,